

四庫全書

史部

欽定四庫全書

史部

釋史卷一百三十二

詳校官檢討臣羅國俊

編修臣裴謙覆勘

覆校官博士臣劉光第

校對官中書臣田尹衡

謄錄舉人臣周元濬

欽定四庫全書

釋史卷一百三十二

靈璧縣知縣馬驕撰

屈原流放

史記屈原者名平楚之同姓也為楚懷王左徒博聞強志明於治亂嫺於辭令入則與王圖議國事以出號令出則接遇賓客應對諸侯王甚任之上官大夫與之同列爭寵而心害其能懷王使屈原造為憲令屈平屬草藁未定上官大夫見而欲奪之屈平不與因讒之曰王

使屈平為令衆莫不知每一令出平伐其功曰以為非  
我莫能為也王怒而疏屈平屈平疾王聽之不聰也讒  
諂之蔽明也邪曲之害公也方正之不容也故憂愁幽  
思而作離騷離騷者猶離憂也夫天者人之始也父母  
者人之本也人窮則反本故勞苦倦極未嘗不呼天也  
疾痛慘怛未嘗不呼父母也屈平正道直行竭忠盡智  
以事其君讒人間之可謂窮矣信而見疑忠而被謗能  
無怨乎屈平之作離騷蓋自怨生也國風好色而不淫

小雅怨誹而不亂若離騷者可謂兼之矣上稱帝嚳下  
道齊桓中述湯武以刺世事明道德之廣崇治亂之條  
貫靡不畢見其文約其辭微其志潔其行廉其稱文小  
而其指極大舉類通而見義遠其志潔故其稱物芳其  
行廉故死而不容自疎濯淖汙泥之中蟬蛻於濁穢以  
浮游塵埃之外不獲世之滋垢皜然泥而不滓者也推  
此志也雖與日月爭光可也屈平既絀其後秦欲伐齊  
齊與楚從親惠王患之乃令張儀祥去秦厚幣委質事

楚曰秦甚憎齊齊與楚從親楚誠能絕齊秦願獻商於之地六百里楚懷王貪而信張儀遂絕齊使使如秦受地張儀詐之曰儀與王約六里不聞六百里楚使怒去歸告懷王懷王怒大興師伐秦秦發兵擊之大破楚師於丹浙斬首八萬虜楚將屈匄遂取楚之漢中地懷王乃悉發國中兵以深入擊秦戰於藍田魏聞之襲楚至鄧楚兵懼自秦歸而齊竟怒不救楚楚大困明年秦割漢中地與楚以和楚王曰不願得地願得張儀而甘心

馬張儀聞乃曰以一儀而當漢中地臣請往如楚如楚  
又因厚幣用事者臣靳尚而設詭辨於懷王之寵姬鄭  
袖懷王竟聽鄭袖復釋去張儀是時屈平既疏不復在  
位使於齊顧反諫懷王曰何不殺張儀懷王悔追張儀  
不及其後諸侯共擊楚大破之殺其將唐昧時秦昭王  
與楚婚欲與懷王會懷王欲行屈平曰秦虎狼之國不  
可信不如無行懷王稚子子蘭勸王行奈何絕秦歡懷  
王卒行入武關秦伏兵絕其後因留懷王以求割地懷

王怒不聽亡走趙趙不內復之秦竟死於秦而歸葬長  
子頃襄王立以其弟子蘭為令尹楚人既咎子蘭以勸  
懷王入秦而不反也屈平既嫉之雖放流睠顧楚國繫  
心懷王不忘欲反冀幸君之一悟俗之一改也其存君  
興國而欲反覆之一篇之中三致志焉然終無可奈何  
故不可以反卒以此見懷王之終不悟也人君無愚智  
賢不肖莫不欲求忠以自為舉賢以自佐然亡國破家  
相隨屬而聖君治國累世而不見者其所謂忠者不忠



而所謂賢者不賢也懷王以不知忠臣之分故內惑於  
鄭袖外欺於張儀疏屈平而信上官大夫令尹子蘭兵  
挫地削亡其六郡身客死於秦為天下笑此不知人之  
禍也易曰井渫不食為我心惻可以汲王明並受其福  
王之不明豈足福哉令尹子蘭聞之大怒卒使上官大  
夫短屈原於頃襄王頃襄王怒而遷之屈原至於江濱  
被髮行吟澤畔顏色憔悴形容枯槁漁父見而問之曰  
子非三閭大夫歟何故而至此屈原曰舉世混濁而我

獨清衆人皆醉而我獨醒是以見放漁父曰夫聖人者  
不凝滯於物而能與世推移舉世混濁何不隨其流而  
揚其波衆人皆醉何不舖其糟而啜其醪何故懷瑾握  
瑜而自令見放為屈原曰吾聞之新沐者必彈冠新浴  
者必振衣人又誰能以身之察察受物之汶汶者乎寧  
赴常流而葬乎江魚腹中耳又安能以皓皓之白而蒙  
世之溫蠖乎乃作懷沙之賦於是懷石遂自投汨羅以  
死

新序屈原者楚之同姓大夫有博通之知清潔之行  
懷王用之秦欲吞滅諸侯并兼天下屈原為楚東使

於齊以結強黨秦國患之使張儀之楚貨楚貴臣上官大夫靳尚之屬上及令尹子蘭司馬子椒內賂夫人鄭袖共譖屈原屈原遂放於外乃作

離騷

漢書屈原賦二十五篇

楚辭

離騷

帝高陽之苗裔兮朕皇考曰伯庸攝提貞于孟

陬兮惟庚寅吾以降皇覽揆余于初度兮肇錫余以嘉名名余曰正則兮字余曰靈均紛吾既有此內美兮又重之以修能扈江離與辟芷兮紉秋蘭以為佩汨余若將弗及兮恐年歲之不吾與朝搴阰之木蘭兮夕攬中洲之宿莽日月忽其不淹兮春與秋其代序惟草木之

零落兮恐美人之遲暮不撫壯而棄穢兮何不改乎此  
度也乘騏驎以馳騁兮來吾道夫先路昔三后之純粹  
兮固衆芳之所在雜申椒與菌桂兮豈惟紉夫蕙茝彼  
堯舜之耿介兮既遵道而得路何桀紂之昌被兮夫惟  
捷徑以窘步惟黨人之偷樂兮路幽昧以險隘豈余身  
之憚殃兮恐皇輿之敗績忽奔走以先後兮及前王之  
踵武荃不揆余之中情兮反信讒而齎怒余固知蹇蹇  
之為患兮余忍而不能舍也指九天以為正兮夫惟靈

修之故也曰黃昏以為期羗中道而改路初既與余成  
言兮後悔遁而有他余既不難夫離別兮傷靈修之數  
化余既滋蘭之九畹兮又樹蕙之百畹畦留夷與揭車  
兮雜杜蘅與芳芷冀枝葉之峻茂兮願竢時乎吾將刈  
雖萎絕其亦何傷兮哀衆芳之蕪穢衆皆競進而貪婪  
兮憑不戢乎求索羗內恕己以量人兮各興心而嫉妬  
忽馳騫以追逐兮非余心之所急老冉冉其将至兮恐  
修名之不立朝飲木蘭之墜露兮夕餐秋菊之落英苟

余情其信姱以練要兮長顙頓亦何傷擘木根以結茝  
兮貫薜荔之落蕊矯菌桂以紉蕙兮索胡繩之纒纒蹇  
吾法夫前修兮非世俗之所服雖不周於今之人兮願  
依彭咸之遺則長太息以掩涕兮哀民生之多艱余雖  
好修姱以鞿羈兮謇朝諝而夕替既替余以蕙纒兮又  
申之以攬茝亦余心之所善兮雖九死其猶未悔怨靈  
修之浩蕩兮終不察夫民心衆女嫉余之蛾眉兮謠詠  
謂余以善淫固時俗之工巧兮偃規矩而改錯背繩墨

以追曲兮競周容以為度忤鬱邑余侘傺兮吾獨窮困  
乎此時也寧溘死以流亡兮余不忍為此態也鷙鳥之  
不羣兮自前世而固然何方圜之能周兮夫孰異道而  
相安屈心而抑志兮忍尤而攘詬伏清白以死直兮固  
前聖之所厚悔相道之不察兮延佇乎吾將反回朕車  
以復路兮及行迷之未遠步余馬於蘭皋兮馳椒丘且  
焉止息進不入以離尤兮退將復修吾初服製芰荷以  
為衣兮集芙蓉以為裳不吾知其亦已兮苟余情其信

芳高余冠之岌岌兮長余佩之陸離芳與澤其雜糅兮  
惟昭質其猶未虧忽反顧以遊目兮將往觀乎西荒佩  
繽紛其繁飾兮芳菲菲其彌章民生各有所樂兮余獨  
好修以為常雖體解吾猶未變兮非余心之可懲女嬃  
之嬋媛兮申申其詈余曰鮌婞直以亡身兮終然殒乎  
羽之野汝何博謬而好修兮紛獨有此姱節資素施以  
盈室兮判獨離而不服衆不可戶說兮孰云察余之中  
情世並舉而好朋兮夫何楚獨而不余聽依前聖以節



中兮喟憑心而歷茲濟沅湘以南征兮就重華而陳詞  
啟九辯與九歌兮夏康娛以自縱不顧難以圖後兮五  
子用失乎家巷羿淫遊以佚田兮又好射夫封狐國亂  
流其鮮終兮浞又貪夫厥家澆身被於強圉兮縱欲殺  
而不忍日康娛以自忘兮厥首用夫顛隕夏桀之常違  
兮乃遂焉而逢殃后辛之菹醢兮殷宗用之不長湯禹  
嚴而祇敬兮周論道而莫差舉賢而授能兮修繩墨而  
不頗皇天無私阿兮覽民德焉錯輔夫惟聖哲以茂行

兮苟得用此下土瞻前而顧後兮相觀民之計極夫孰  
非義而可用兮孰非善而可服貼余身而危死兮覽余  
初其猶未悔不量鑿而正柄兮固前修以道醺曾歔歔  
余鬱邑兮哀朕時之不當搢茹蕙以掩涕兮霑余襟之  
浪浪跪敷衽以陳辭兮耿吾既得此中正馳玉虬以乘  
鸞兮溘埃風余上征朝發軔於蒼梧兮夕余至乎縣圃  
欲少留此靈瑱兮日忽忽其將暮吾令羲和弭節兮望  
崦嵫而未迫路曼曼其修遠兮吾將上下而求索飲余

馬於咸池兮總余轡乎扶桑折若木以拂日兮聊逍遙  
以相羊前望舒使先驅兮後飛廉使奔屬鸞皇為余前  
戒兮雷師告余以未具吾令鳳皇飛騰兮繼之以日夜  
飄風屯其相離兮率雲霓而來御紛總總其離合兮斑  
陸離其上下吾令帝閭開關兮倚閭闔而望予時曖曖  
其將罷兮結幽蘭以延佇世溷濁而不分兮好蔽美而  
嫉妬朝吾將濟於白水兮登閭風而縹馬忽反顧以流  
涕兮哀高邱之無女嗟吾遊此春宮兮折瓊枝以繼佩

及榮華之未落兮相下女之可詒吾令豐隆乘雲兮求  
宓妃之所在解佩纓以結言兮吾令蹇修以為理紛總  
總其離合兮忽緯繡其難遷夕歸次於窮石兮朝濯髮  
乎洧盤保厥美以驕敖兮日康娛以淫遊雖信美而無  
禮兮來違棄而改求覽相觀於四極兮周流乎天余乃  
下望瑤臺之偃蹇兮見有娥之佚女吾令鳩為媒兮鳩  
告余以不好雄鳩之鳴逝兮余猶惡其佻巧心猶豫而  
狐疑兮欲自適而不可鳳皇既受詒兮恐高辛之先我

欲遠集而無所止兮聊浮遊以逍遙及少康之未家兮  
留有虞之二姚理弱而媒拙兮恐導言之不固世溷濁  
而嫉賢兮好蔽善而稱惡閨中既遠遠兮哲王又不寤  
懷朕情而不發兮余焉能忍與此終古索蘼茅以筵簞  
兮命靈氛為余占之曰兩美其必合兮孰信修而慕之  
思九州之博大兮豈惟是其有女曰勉遠逝而無狐疑  
兮孰求美而釋女何所獨無芳草兮爾何懷乎故宇世  
幽昧以眩曜兮孰云察余之善惡民好惡其不同兮惟

此黨人其獨異戶服艾以盈要兮謂幽蘭其不可佩覽  
察草木其猶未得兮豈理美之能當蘇糞壤以充幃兮  
謂申椒其不芳欲從靈氛之吉占兮心猶豫而狐疑巫  
咸將夕降兮懷椒糈而要之百神翳其備降兮九疑繽  
其並迎皇剡剡其揚靈兮告余以吉故曰勉升降以上  
下兮求矩矱之所同湯禹儼而求合兮摯咎繇而能調  
苟中情其好修兮又何必用夫行媒說操築於傅巖兮  
武丁用而不疑呂望之鼓刀兮遭周文而得舉甯戚之

謳歌兮齊桓聞以該輔及年歲之未晏兮時亦猶其未  
央恐鵲鳩之先鳴兮使夫百草為之不芳何瓊佩之偃  
蹇兮衆蔑然而蔽之惟此黨人之不諒兮恐嫉妬而折  
之時繽紛以變易兮又何可以淹留蘭芷變而不芳兮  
荃蕙化而為茅何昔日之芳草兮今直為此蕭艾也豈  
其有他故兮莫好修之害也余以蘭為可恃兮羌無實  
而容長委厥美以從俗兮苟得列乎衆芳椒專佞以慢  
慙兮椒又欲充夫佩褱既干進而務入兮又何芳之能

祗固時俗之後流兮又孰能無變化覽椒蘭其若茲兮  
又況揭車與江離惟茲佩其可貴兮委厥美而歷茲芳  
菲菲而難虧兮芬至今猶未沫和調度以自娛兮聊浮  
游而求女及余飾之方壯兮周流觀乎上下靈氛既告  
余以吉占兮歷吉日乎吾將行折瓊枝以為羞兮精瓊  
蘄以為糧為余駕飛龍兮雜瑤象以為車何離心之可  
同兮吾將遠逝以自疏遭吾道夫崑崙兮路修遠以周  
流揚雲霓之晻霭兮鳴玉鸞之啾啾朝發軔於天津兮



夕余至乎西極鳳凰翼其承旂兮高翱翔之翼翼忽吾  
行此流沙兮遵赤水而容與麾蛟龍以梁津兮詔西皇  
使涉余路修遠以多艱兮騰衆車使徑待路不周以左  
轉兮指西海以爲期屯余車其千乘兮齊玉軼而並馳  
駕八龍之婉婉兮載雲旗之委蛇抑志而弭節兮神高  
馳之邈邈奏九歌而舞韶兮聊暇日以媮樂陟陞皇之  
赫戲兮忽臨睨夫舊鄉僕夫悲余馬懷兮蜷局顧而不  
行亂曰已矣哉國無人莫我知兮又何懷乎故都既莫

足與為美政兮吾將從彭咸之所居

○王逸曰離騷經者屈原之所作也

屈原與楚同姓仕於懷王為三閭大夫三閭之職掌王族三姓曰昭屈原序其譜屬率其賢良以厲國士入則與王圖議政事決定嫌疑出則監察羣下應對諸侯謀行職修王甚珍之同列大夫上官靳尚妬害其能共譖毀之王乃疏屈原屈原執履忠貞而被讒憂心煩亂不知所愬乃作離騷經離別也騷愁也經往也言以放逐離別中心愁思猶陳直徑以風諫君也故上述唐虞三后之制下序桀紂羿浼之敗冀君覺悟反於正道而還己也是時秦昭王使張儀譎詐懷王令絕齊交又使誘楚請與俱會武關遂脅與俱歸拘留不遣卒客死於秦其子襄王復用讒言遷屈原於江南而屈原放逐在山野復作九章援天引聖以自證明終不見省不忍以清白久居濁世遂赴汨淵自沈而死離騷之文依詩取興引類譬諭故善鳥香草以配忠貞惡禽臭物以比

讒佞靈修美人以嬋於君安妃佚女以磨賢臣虬龍鸞鳳以託君子飄風雲霓以為小人其詞溫而雅其義皎而朗凡百君子莫不慕其清高嘉其文采哀其不遇而閔其志焉文心雕龍自風雅寢聲莫或抽緒奇文蔚起其離騷哉固已軒翥詩人之後奮飛辭家之前豈去聖之未遠而楚人之多才乎昔漢武愛騷而淮南作傳以為國風好色而不淫小雅怨諱而不亂若離騷者可謂兼之蟬蛻穢濁之中浮游塵埃之外曠然淠而不緇雖與日月爭光可也班固以為露才揚己忿懣沈江羿澆二姚與左氏不合崑崙縣圃非經義所載然而文辭麗雅為詞賦之宗雖非明哲可謂妙才王逸以為詩人之提耳屈原婉順離騷之文依經立義駟虬乘鸞則時乘六龍崑崙流沙則禹貢敷土名儒辭賦莫不擬其儀表所謂金相玉質百世無匹者也及漢宣嗟嘆以為皆合經術揚雄諷味亦言體同詩雅四家舉以方經而孟堅謂不合傳褒貶任聲抑揚過實可謂鑒而弗精翫而

未覈者也將覈其論必徵言焉故其陳堯舜之耿介稱  
禹湯之祗敬典詰之體也讖紱紂之猖披傷羿澆之顛  
隕規風之旨也虬龍以喻君子雲霓以譬讒邪比興之  
義也每一顧而掩涕歎君門之九重忠怨之辭也觀茲  
四事同於風雅者也至於託雲龍說迂怪豐隆求宓妃  
鵲鳥媒城女詭異之辭也康回傾地夷羿殛日木夫九  
首土伯三目謫怪之談也依彭咸之遺則從子胥以自  
適猶狹之志也士女雜坐亂而不分指以為樂娛酒不  
廢沈湎日夜舉以為歡荒淫之意也槪此四事異乎經  
典者也故論其典語則如彼語其夸誕則如此固知楚  
辭者體慢於三代而風雅於戰國乃雅頌之博徒而詞  
賦之英傑也觀其骨鯁所樹肌膚所附雖取鎔經意亦  
自鑄偉辭故騷經九章朗麗以哀志九歌九辯綺麗以  
傷情遠遊天問瓌詭而惠巧招魂大招耀艷而深華卜  
居標放言之致漁父寄獨往之才故能氣往轢古辭來  
切今驚采絕艷難與並能矣自九懷已下遽躡其跡而

屈宋逸步莫之能追故其叙情怨則鬱伊而易感述離  
居則愴怏而難懷論山水則循聲而得貌言節候則依  
文而見時枚賈追風以入麗馬揚泓波而得奇其衣被  
詞人非一代也故才高者苑其鴻裁中巧者獵其艷辭  
吟詠者銜其山川童蒙者拾其香草若能憑軾以倚雅  
頌懸轡以馭楚篇酌奇而不失其貞玩華而不墜其實  
則顧盼可以驅辭力欬唾可以窮文致亦不復乞靈於  
長卿假寵於子淵矣讚曰不有屈原豈見離騷驚才風  
逸壯志煙高山川無極情理  
實勞金相玉式艷溢鎔毫

九歌

吉日兮辰良穆將愉

兮上皇撫長劍兮玉珥璫鏘鳴兮琳琅瑶席兮玉瑱盍  
將把芳瓊芳蕙肴蒸兮蘭藉奠桂酒兮椒漿揚枹兮拊  
鼓疏緩節兮安歌陳竽瑟兮浩倡靈偃蹇兮姱服芳菲

菲芳滿堂五音紛芳繁會君欣欣芳樂康

○東皇太一

浴

蘭湯芳沐芳華采衣芳若英靈連蜷芳既留爛昭昭芳

未央蹇將憺芳壽宮與日月芳齊光龍駕芳帝服聊翱

遊芳周章靈皇皇芳既降焱遠舉芳雲中覽冀州芳有

餘橫四海芳焉窮思夫君芳太息極勞心芳懣懣

○雲中君

君不行芳夷猶蹇誰留芳中洲美要眇芳宜修沛吾乘

芳桂舟令沅湘芳無波使江水芳安流望夫君芳未來

吹參差芳誰思駕飛龍芳北征遭吾道芳洞庭薜荔拍

兮蕙綢繇橈兮蘭旌望涪陽兮極浦橫大江兮揚靈揚  
靈兮未極女嬋媛兮為余太息橫流涕兮潺湲隱思君  
兮徘徊桂櫂兮蘭枻斲冰兮積雪采薜荔兮水中搴芙蓉  
兮木末心不同兮媒勞恩不甚兮輕絕石瀨兮淺淺  
飛龍兮翩翩交不忠兮怨長期不信兮告余以不閒鼉  
騁騫兮江皋夕弭節兮北渚鳥次兮屋上水周兮堂下  
捐余玦兮江中遺余佩兮澧浦采芳洲兮杜若將以遺  
兮下女時不可兮再得聊逍遙兮容與

○湘君

帝子降

兮北渚目眇眇兮愁余嫋嫋兮秋風洞庭波兮木葉下  
登白蘋兮騁望與佳期兮夕張鳥何萃兮蘋中曾何為  
兮木上沅有芷兮澧有蘭思公子兮未敢言恍惚兮遠  
望觀流水兮潺湲麋何為兮庭中蛟何為兮水裔朝馳  
余馬兮江皋夕濟兮西澨聞佳人兮召予將騰駕兮偕  
逝築室兮水中葺之兮荷蓋蓀壁兮紫壇射芳椒兮盈  
堂桂棟兮蘭橈辛夷楣兮葯房罔薜荔兮為帷擗蕙櫝  
兮既張白玉兮為鎮疏石蘭兮為芳芷葺兮荷屋療之



兮杜衡合百草兮實庭建芳馨兮廡門九疑繽兮並迎  
靈之來兮如雲捐余袂兮江中遺余襟兮澧浦牽汀洲  
兮杜若將以遺兮遠者時不可兮驟得聊逍遙兮容與

○湘  
夫人

廣開兮天門紛吾乘兮玄雲令飄風兮先驅使

凍雨兮灑塵君回翔兮以下踰空桑兮從女紛總總兮  
九州何壽夭兮在予高飛兮安翔乘清氣兮御陰陽吾  
與君兮齊速道帝之兮九阡靈衣兮披披玉佩兮陸離  
壹陰兮壹陽衆莫知兮余所為折疏麻兮瑤華將以遺

兮離居老冉冉兮既極不淺近兮愈疏乘龍兮鱗鱗高  
駝兮冲天結桂枝兮延佇羗愈思兮愁人兮奈何  
願若今兮無虧固人命兮有當孰離合兮可為

○大司命

蘼蘭兮麝蕪羅生兮堂下綠葉兮素枝芳菲菲兮襲予  
夫人兮自有美子孫何以兮愁苦蘼蘭兮青青綠葉兮  
紫莖滿堂兮美人忽獨與余兮目成入不言兮出不辭  
乘回風兮載雲旗悲莫悲兮生別離樂莫樂兮新相知  
荷衣兮蕙帶儵而來兮忽而逝夕宿兮帝郊君誰須兮

雲之際與女遊兮九河衝風至兮水揚波與女沐兮咸

池晞女髮兮陽之阿望美人兮未來臨風恍兮浩歌孔

蓋兮翠旌登九天兮撫彗星竦長劍兮擁幼艾荃獨宜

兮為民正

○少司命

暉將出兮東方照吾檻兮扶桑撫余

馬兮安驅夜皎皎兮既明駕龍輶兮乘雷載雲旗兮委

蛇長太息兮將上心伫徊兮顧懷羗色聲兮娛人觀者

憺兮忘歸絙瑟兮交鼓蕭鐘兮瑤簫鳴飀兮吹竽思靈

保兮賢姱翺飛兮翠曾展詩兮會舞應律兮合節靈之

來兮蔽日青雲衣兮白霓裳舉長矢兮射天狼操余弧  
兮反淪降援北斗兮酌桂漿撰余轡兮高駝翔杳冥冥  
兮以東行

○東君

與女遊兮九河衝風起兮水橫波乘

水車兮荷蓋駕兩龍兮驂螭登崑崙兮四望心飛揚兮  
浩蕩日將暮兮悵忘歸惟極浦兮寤懷魚鱗屋兮龍堂  
紫貝闕兮朱宮靈何為兮水中乘白鼉兮逐文魚與女  
遊兮河之渚流澌紛兮將來下子交手兮東行送美人  
兮南浦波滔滔兮來迎魚鱗鱗兮媵予

○河伯

若有人

兮山之阿被薜荔兮帶女蘿既含睇兮又宜笑予慕予  
兮善窈窕乘赤豹兮從文狸辛夷車兮結桂旗被石蘭  
兮帶杜衡折芳馨兮遺所思余處幽篁兮終不見天路  
險難兮獨後來表獨立兮山之上雲容容兮而在下杳  
冥冥兮羌晝晦東風飄飄兮神靈雨留靈修兮憺忘歸  
歲既晏兮孰華予采三秀兮於山間石磊磊兮葛蔓蔓  
怨公子兮悵忘歸君思我兮不得間山中人兮芳杜若  
飲石泉兮蔭松柏君思我兮然疑作雷填填兮雨冥冥

援啾啾兮狄夜鳴風颯颯兮木蕭蕭思公子兮徒離憂

○山鬼

操吳戈兮被犀甲車錯轂兮短兵接旌蔽日兮

敵若雲矢交墜兮士爭先凌余陳兮躡余行左驂殪兮

右刃傷霾兩輪兮繫四馬援玉枹兮擊鳴鼓天時墜兮

威靈怒嚴殺盡兮棄原壄出不入兮往不反平原忽兮

路超遠帶長劍兮挾秦弓首雖離兮心不懲誠既勇兮

又以武終剛強兮不可凌身既死兮神以靈魂魄毅兮

為鬼雄

○國殤

盛禮兮會鼓傳芭兮代舞姱女倡兮容

與春蘭兮秋菊長無絕兮終古

○禮菟○王逸曰九歌者屈原之所作也昔楚

國南郢之邑沅湘之間其俗信鬼而好祀其祠必作歌樂鼓舞以樂諸神屈原放逐竄伏其域出見俗人祭祀之禮歌舞之樂其詞鄙陋因為九歌之曲上陳事神之敬下以見己之寃結託之以風諫

天問曰遂

古之初誰傳道之上下未形何由考之冥昭瞢闇誰能

極之馮翼惟像何以識之明明闇闇惟時何為陰陽三

合何本何化圜則九重孰營度之惟茲何功孰初作之

斡維焉繫天極焉加八柱何當東南何虧九天之際安

放安屬隅隈多有誰知其數天何所沓十二焉分日月

安屬列星安陳出自湯谷次於蒙汜自明及晦所行幾  
里夜光何德死則又育厥利維何而顧菟在腹女岐無  
合夫焉取九子伯強何處惠氣安在何闔而晦何開而  
明角宿未旦曜靈安藏不任汨鴻師何以尚之僉答何  
憂何不課而行之鵩龜曳銜鮌何聽焉順欲成功帝何  
刑焉永遏在羽山夫何三年不施伯禹腹鮌夫何以變  
化纂就前緒遂成考功何續初繼業而厥謀不同洪泉  
極深何以寘之地方九則何以墳之應龍何畫河海何



歷鮐何所營禹何所成康回馮怒地何故以東南傾九  
州何錯川谷何滂東流不溢孰知其故東西南北其修  
孰多南北順隴其衍幾何崑崙縣圃其尻安在增城九  
重其高幾里四方之門其誰從焉西北闢啟何氣通焉  
日安不到燭龍何照羲和之未揚若華何光何所冬暖  
何所夏寒焉有石林何獸能言焉有虬龍負熊以遊雄  
虺九首儵忽焉在何所不死長人何守靡蓰九衢泉華  
安居一蛇吞象厥大何如黑水玄趾三危安在延年不

死壽何所止鮫魚何所魋堆焉處羿焉彈日焉解羽  
禹之力獻功降省下土四方焉得彼兪山女而通之于  
台桑閔妃匹合厥身是繼胡維嗜欲不同味而快鼂飽  
啟代益作后卒然離蠶何啟惟憂而能拘是達皆歸射  
籍而無害厥躬何后益作草而禹播降啟棘賓商九辯  
九歌何勤子屠母而死分竟墜帝降夷羿草孽夏民胡  
羿射夫河伯而妻彼雒嬪馮珧利決封豨是射何獻蒸  
肉之膏而后帝不若浞娶純狐眩妻爰謀何羿之射草

而交吞揆之阻窮西征巖何越焉化而為黃熊巫何活  
焉咸播秬黍莆藿是營何由并投而鮪疾修盈白蜺嬰  
弟胡為此堂安得夫良藥不能固臧天式從橫陽離爰  
死大鳥何鳴夫焉喪厥體萍號起雨何以興之撰體協  
脅鹿何膺之鼇戴山抃何以安之釋舟陵行何以遷之  
惟澆在戶何求于嫂何少康逐犬而顛墮厥首女歧縫  
裳而館同爰止何顛易厥首而親以逢殆湯謀易旅何  
以厚之覆舟斟尋何道取之桀伐蒙山何所得焉妹嬉

何肆湯何殛焉舜閔在家父何以鰥堯不姚告二女何  
親厥萌在初何所意焉璜臺十城誰所極焉登立為帝  
孰道尚之女媧有體孰制匠之舜服厥弟終然為害何  
肆犬豕而厥身不危敗吳獲迄古南嶽是止孰期去斯  
得兩男子緣鵠飾玉后帝是饗何承謀夏桀終以滅喪  
帝乃降觀下逢伊摯何條放致罰而黎伏大說簡狄在  
臺饗何宜玄鳥致貽女何喜該秉季德厥父是臧胡終  
弊於有扈牧夫牛羊干協時舞何以懷之平脅曼膚何

以肥之有扈牧豎云何而逢擊牀先出其命何從恒秉  
季德焉得夫朴牛何往營班祿不但還來昏微循迹有  
狄不寧何繁鳥萃棘負子肆情眩弟並淫危害厥兄何  
變化以作詐後嗣而逢長成湯東巡有萃爰極何乞彼  
小臣而吉妃是得水濱之木得彼小子夫何惡之媵有  
莘之婦湯出重泉夫何臯尤不勝心伐帝夫誰使挑之  
會鼂爭盟何踐吾期蒼鳥羣飛孰使萃之列擊紂躬叔  
旦不嘉何親揆發定周之命以咨嗟授殷天下其位安

施反成乃亡其臯伊何爭遣伐器何以行之並驅擊翼  
何以將之昭后成遊南土爰底厥利維何逢彼白雉穆  
王巧梅夫何為周流環理天下夫何索求妖夫曳銜何  
號于市周幽誰誅焉得夫褒姒天命反側何罰何佑齊  
桓九會卒然身殺彼王紂之躬孰使亂惑何惡輔弼讒  
諂是服比干何逆而抑沈之雷開阿順而賜封之何聖  
人之一德卒其異方梅伯受醢箕子詳狂稷維元子帝  
何篤之投之于冰上烏何燠之何馮弓挾矢殊能將之

既驚帝切激何逢長之伯昌號衰秉鞭作牧何令徹彼  
歧社命有殷之國遷藏就歧何能依殷有惑婦何所譏  
受賜茲醢西伯上告何親就上帝罰殷之命以不救師  
望在肆昌何志鼓刀揚聲后何喜武發殺殷何所悒載  
尸集戰何所急伯林雉經維其何故何感天抑墜夫誰  
畏懼皇天集命惟何戒之受禮天下又使至代之初湯  
臣摯後茲承輔何卒官湯尊食宗緒勲闔夢生少離散  
亡何壯武厲能流厥嚴彭鏗斟雉帝何饗壽永多夫何

久長中央共牧后何怒螽蟻微命力何固驚女采薇鹿  
何祐北至回水萃何喜凡有噬犬弟何欲易之以百兩  
卒無祿薄暮雷電歸何憂厥嚴不奉帝何求伏匿穴處  
爰何云荆黜作師夫何長先悟過改更我又何言吳光  
爭國久余是勝何環穿自閤社丘陵爰出子文吾告堵  
敖以不長何試上自予忠名彌彰

○王逸曰天問者屈原之所作也屈原故

逐憂心愁悴見楚有先王之廟及公卿祠堂圖畫天地山川神靈琦瑋儵倏及古聖賢怪物行事因書其壁呵而問之以滌憤懣故

遠遊

悲時俗之迫阨兮願輕舉而

其文義不次敘云爾



遠遊質菲薄而無因兮焉託乘而上浮遭沈濁而汙穢  
兮獨鬱結其誰語夜炯炯而不寐兮魂營營而至曙惟  
天地之無窮兮哀人生之長勤往者余弗及兮來者吾  
不聞步徙倚而遙思兮怊惝恍而永懷意荒忽而流蕩  
兮心愁悽而增悲神儵忽而不返兮形枯槁而獨留內  
惟省以端操兮求正氣之所由漠虛靜以恬愉兮澹無  
為而自得聞赤松之清塵兮願承風乎遺則貴真人之  
休德兮羨往世之登仙與化去而不見兮名聲著而日

延奇傳說之託辰星兮羨韓衆之得一形穆穆以浸遠  
兮離人羣而遁逸因氣變而遂曾舉兮忽神竄而鬼怪  
時髣髴以遙見兮精皎皎以往來絕氛埃而淑尤兮終  
不反其故都免衆患而不思兮世莫知其所如恐天時  
之代序兮耀靈畢而西征微霜降而下淪兮悼芳草之  
先零聊仿佯而逍遙兮永歷年而無成誰可與玩斯遺  
芳兮晨向風而舒情高陽邈以遠兮余將焉所程重曰  
春秋忽其不淹兮奚久留此故居軒轅不可攀援兮吾

將從王喬而娛戲殮六氣而飲沆瀣兮漱正陽而含朝霞保神明之清澄兮精氣入而麤穢除順凱風以從遊兮至南巢而壹息見王子而宿之兮審壹氣之和德曰道可受兮不可傳其小無內兮其大無垠無涸滑而魂兮彼將自然壹氣孔神兮於中夜存虛以待之兮無為之先庶類以成兮此德之門聞至貴而遂徂兮忽乎吾將行仍羽人於丹丘兮留不死之舊鄉朝濯髮於湯谷兮夕晞余身兮九陽吸飛泉之微液兮懷琬琰之華英

玉色頽以晚顏兮精醇粹而始壯質銷鑠以汨約兮神  
要眇以淫放嘉南州之炎德兮麗桂樹之冬榮山蕭條  
而無獸兮野寂寞乎無人載營魄而登霞兮掩浮雲而  
上征命天閭其開闔兮排閭闔而望予召豐隆使先導  
兮問太微之所居集重陽入帝宮兮造旬始而觀清都  
朝發軔於太儀兮夕始臨乎微於閭屯余車之萬乘兮  
紛容與而並馳駕八龍之婉婉兮載雲旗之逶蛇建雄  
虹之采旄兮五色雜而炫耀服偃蹇以低昂兮驂連蜷

以驕驚騎膠葛以雜亂兮斑漫衍而方行撰余轡而正  
策兮吾將過乎勾芒歷太皓以右轉兮前飛廉以啟路  
陽杲杲其未光兮凌天地以徑度風伯為余先驅兮辟  
氛埃而清涼鳳凰翼其承旂兮遇蓐收乎西皇曄彗星  
以為旂兮舉斗柄以為麾叛陸離其上下兮遊驚霧之  
流波皆晻曖其矐莽兮召玄武而奔屬後文昌使掌行  
兮選署衆神以並轂路曼曼其悠遠兮徐弭節而高厲  
左雨師使徑侍兮右雷公以為衛欲遠度世以忘歸兮

意恣睢以担矯內欣欣而自美兮聊媮娛以自樂涉青  
雲以汎濫游兮忽臨睨夫舊鄉僕夫懷余心悲兮邊馬  
顧而不行思舊故以想像兮長太息而掩涕汜容與而  
遐舉兮聊抑志而自弭指炎神而直馳兮吾將往乎南  
疑覽方外之荒忽兮沛涸瀆而自浮祝融戒而蹕御兮  
騰告鸞鳥迎宓妃張樂咸池奏承雲兮二女御九韶歌  
使湘靈鼓瑟兮令海若舞馮夷玄螭蟲象並出進兮形  
螺虬而逶迤雌蜺便娟以增撓兮鸞鳥軒翥而翔飛音

樂博衍無終極兮，乃逝以徘徊。舒并節以馳騫兮，連絕垠乎寒門。軼迅風於清源兮，從顓頊乎增冰。歷玄冥以邪徑兮，乘間維以反顧。名黔羸而見之兮，為余先乎平路。經營四荒兮，周流六漠。上至列缺兮，降望大壑。下崢嶸而無地兮，上寥廓而無天。視儵忽而無見兮，聽惝恍而無聞。超無為以至清兮，與太初而為鄰。○王逸曰：遠遊者，屈原之所作也。屈原履方直之行，不容於世，遂敘妙思，託配仙人，與俱遊戲，周歷天地，無所不到。然猶懷念楚國，思慕舊故，是以君子珍重其志，而瑋其辭焉。

卜居屈原既放，三年不得復見。

竭知盡忠而蔽鄣於讒心煩慮亂不知所從乃往見太卜鄭詹尹曰余有所疑願因先生決之詹尹乃端策拂龜曰君將何以教之屈原曰吾寧悃悃款款朴以忠乎將送往勞來斯無窮乎寧誅鋤草茅以力耕乎將游大人以成名乎寧正言不諱以危身乎將從俗富貴以媮生乎寧超然高舉以保真乎將呴訾慄斯喔咿儒兒以事婦人乎寧廉潔正直以自清乎將突梯滑稽如脂如韋以絜楹乎寧昂昂若千里之駒乎將汜汜若水中之



見乎與波上下偷以全吾軀乎寧與騏驎亢軛乎將隨  
驚馬之迹乎寧與黃鵠比翼乎將與雞鶩爭食乎此孰  
吉孰凶何去何從世溷濁而不清蟬翼為重千鈞為輕  
黃鐘毀棄瓦釜雷鳴讒人高張賢士無名吁嗟默默芳  
誰知吾之廉貞詹尹乃釋策而謝曰夫尺有所短寸有  
所長物有所不足智有所不明數有所不逮神有所不  
通用君之心行君之意龜策誠不能知此事

○王逸曰  
卜居者屈

原之所作也屈原履忠貞之性而見嫉妒念讒佞之臣  
承君順非而蒙富貴已執忠直而身放棄心迷意惑不

知所為乃往至太卜之家稽問神明決之著龜卜已居世何所宜行冀聞異策以定嫌疑故曰卜居也

漁父

屈原既放遊於江潭行吟澤畔顏色憔悴形容枯槁

漁父見而問之曰子非三閭大夫與何故至於斯屈原曰舉世皆濁而我獨清衆人皆醉而我獨醒是以見放漁父曰夫聖人者不凝滯於物而能與世推移舉世皆濁何不渥其泥而揚其波衆人皆醉何不鋪其糟而歠其醢何故懷瑾握瑜而自令放為屈原曰吾聞之新沐者必彈冠新浴者必振衣安能以身之察察受物之汙

汶者乎寧赴湘流葬於江魚之腹中又安能以皎皎之  
白而蒙世俗之塵埃乎漁父莞爾而笑鼓枻而去歌曰  
滄浪之水清兮可以濯吾纓滄浪之水濁兮可以濯吾

足遂去不復與言

○王逸曰漁父者屈原之所作也屈原放逐在江湘之間憂愁嘆吟儀容

變易而漁父避世隱身釣魚江濱欣然自樂時遇屈原川澤之域怪而問之遂相應答焉

九惜誦

以致愍兮發憤以抒情所非忠而言之兮指蒼天以為  
正今五帝以折中兮戒六神與嚮服俾山川以備御兮  
命咎繇使聽直竭忠誠以事君子兮反離羣而贅肱忘

儼媚以背衆兮待明君其知之言與行其可迹兮情與  
貌其不變故相臣莫若君兮所以證之而不遠吾誼先  
君而後身兮羌衆人之所仇專惟君而無他兮又衆兆  
之所讐壹心而不豫兮羌不可保疾親君而無他兮有  
招禍之道思君其莫我忠兮忽忘身之賤貧事君而不  
貳兮迷不知寵之門忠何罪以遇罰兮亦非余心之所  
志行不羣以巔越兮又衆兆之所咤紛逢尤以離謗兮  
謫不可釋情沈抑而不達兮又蔽而莫之白心鬱邑余

侘僚兮又莫察余之中情固煩言不可結而詒兮願陳  
志而無路退靜默而莫余知兮進號呼又莫吾聞申侘  
僚之煩惑兮中悶瞀之忪忪昔余夢登天兮魂中道而  
無杭吾使厲神占之兮曰有志極而無旁終危獨以離  
異兮曰君可思而不可恃故衆口其鑠金兮初若是而  
逢殆懲於羹而吹壺兮何不變此之志也欲釋階而登  
天兮猶有曩之態也駭遽以離心兮又何以為此伴也  
同極而異路兮又何以為此援也晉申生之孝子兮父

信讒而不好行婞直而不豫兮鉉功用而不就吾聞作  
忠以造怨兮忽謂之過言九折臂而成醫兮吾今而知  
其信然矰弋機而在上兮爵羅張而在下設張辟以娛  
君兮顛側身而無所欲僵偁以干僚兮恐重患而離尤  
欲高飛而遠集兮君罔謂汝何之欲橫奔而失路兮堅  
志而不忍背膺脾合以交痛兮心鬱結而紆軫擣木蘭  
以矯蕙兮鑿申椒以為糧播江離與滋菊兮願春日以  
為糗芳恐情質之不信兮故重著以自明矯茲媚以私

處兮願曾思而遠身

○惜誦

余幼好此奇服兮年既老

而不衰帶長缺之陸離兮冠切雲之崔嵬被明月兮珮  
寶璐世溷濁而莫余知兮吾方高馳而不顧駕青虬兮  
驂白螭吾與重華遊兮瑤之圃登崑崙兮殮玉英與天  
地兮同壽與日月兮同光哀南夷之莫吾知兮旦余濟  
乎江湘乘鄂渚而反顧兮欽秋冬之緒風步余馬兮山  
皋邸余車兮方林乘艤船余上沅兮齋吳榜以擊汰船  
容與而不進兮淹回水而凝滯朝發枉渚兮夕宿辰陽

苟余心之端直兮雖僻遠之何傷入澗浦余儻徊兮迷  
不知吾之所如深林杳以冥冥兮乃猿狖之所居山峻  
高以蔽日兮下幽晦以多雨霰雪紛其無垠兮雲霏霏  
而承宇哀吾生之無樂兮幽獨處乎山中吾不能變心  
而從俗兮固將愁苦而終窮接輿髡首兮桑扈羸行忠  
不必用兮賢不必以伍子逢殃兮比干菹醢與前世而  
皆然兮吾又何怨乎今之人余將董道而不豫兮固將  
重昏而終身亂曰鸞鳥鳳凰日以遠兮燕雀烏鵲巢堂



壇兮露申辛夷死林薄兮腥臊並御兮不得薄兮陰陽

易位時不當兮懷信侘傺忽乎吾將行兮

江○涉

皇天

之不純命兮何百姓之震愆民離散而相失兮方仲春  
而東遷去故鄉而就遠兮遵江夏以流亡出國門而軫  
懷兮甲之鼂吾以行發郢都而去閭兮怊荒忽其焉極  
揖齊揚以容與兮哀見君而不再得望長楸而太息兮  
涕淫淫其若霰過夏首而西浮兮顧龍門而不見心嬋  
媛而傷懷兮眇不知其所躋順風波以從流兮焉洋洋

而為客凌陽侯之汎濫兮忽翱翔之焉薄心絀結而不  
解兮思蹇產而不釋將運舟而下浮兮上洞庭而下江  
去終古之所居兮今逍遙而來東羌靈魂之欲歸兮何  
須臾而忘反背夏浦而西思兮哀故都之日遠登大墳  
以遠望兮聊以舒吾憂心哀州土之平樂兮悲江介之  
遺風當陵陽之焉至兮嶽南渡之焉如曾不知夏之為  
丘兮孰兩東門之可蕪心不怡之長久兮憂與愁其相  
接惟郢路之遼遠兮江與夏之不可涉忽若去不信兮

至今九年而不復慘鬱鬱而不開兮塞侘傺而含慙外  
承歡之灼灼兮諶荏弱而難持忠湛湛而願進兮妒被  
離而鄣之堯舜之抗行兮瞭杳杳而薄天衆讒人之嫉  
妒兮被以不慈之偽名憎愠愉之修美兮好夫人之忼  
慨衆踈蹠而日進兮美超遠而逾邁亂曰曼余日以流  
觀兮冀壹反之何時鳥飛反故鄉兮狐死必首丘信非  
吾臯而棄逐兮何日夜而忘之

○哀  
郢

心鬱鬱之憂思

兮獨永歎乎增傷思蹇產之不釋兮曼遭夜之方長悲

夫秋風之動容兮何回極之浮浮數惟蓀之多怒兮傷  
余心之慢慢願遙赴而橫奔兮覽民尤以自鎮結微情  
以陳詞兮矯以遺夫美人昔君與我成言兮曰黃昏以  
為期羌中道而回畔兮反既有此他志憐吾以其美好  
兮覽余以其修姱與余言而不信兮蓋為余而造怒願  
承閒而自察兮心震悼而不敢悲夷猶而冀進兮心怛  
傷之憺憺茲歷情以陳辭兮蓀佯聾而不聞固切人之  
不媚兮衆果以我為患初吾所陳之耿著兮豈不至今

其庸亡何獨樂之謇謇兮願蓀美之可完望三五以為  
像兮指彭咸以為儀夫何極而不至兮故遠聞而難虧  
善不由外來兮名不可以虛作孰無施而有報兮孰不  
實而有獲少歌曰與美人抽怨兮并日夜而無正憺吾  
以其美好兮教朕辭而不聽倡曰有鳥自南兮來集漢  
北好姱佳麗兮辟獨處此異域既憚獨而不羣兮又無  
良媒在其側道卓遠而日忘兮願自申而不得望北山  
而流涕兮臨流水而太息望孟夏之短夜兮何晦明之

若歲惟郢路之遼遠兮魂一夕而九逝曾不知路之曲  
直兮南指月與列星願徃逝而不得兮魂識路之營營  
何靈魂之信直兮人之心不與吾心同理弱而媒不通  
兮尚不知余之從容亂曰長瀨湍流沂江潭兮狂顧南  
行聊以娛心兮軫石歲嵬塞吾額兮超回忘度行隱進  
兮低徊夷猶宿北姑兮煩冤瞽容實沛徂兮愁歎苦神  
靈遙思兮路遠處幽又無行媒兮道思作頌聊自救兮  
憂心不遂斯言誰告兮

○抽思

陶陶孟夏兮草木莽莽

傷懷永哀兮汨徂南土。眇兮杳杳孔靜幽默鬱結紆軫  
兮離慙而長鞠撫情效志兮俛屈以自抑。刊方以為圜  
兮常度未替易初本迪兮君子所鄙。章畫志墨兮前圖  
未改。內厚質正兮大人所盛。巧倖不斷兮孰察其揆。正  
玄文處幽兮矇瞶謂之不章。離婁微睇兮瞽以為無明。  
變白而為黑兮倒上以為下。鳳凰在笱兮雞鶩翔舞。同  
糝玉石兮一槩而相量。夫惟黨人鄙固兮羗不知余之  
所藏。任重載盛兮陷滯而不濟。懷瑾握瑜兮窮不得所。

示邑大羣吠兮吠所怪也誹俊疑傑兮固庸態也文質  
疏內兮衆不知余之異采材朴委積兮莫知余之所有  
重仁襲義兮謹厚以為豐重華不可遷兮孰知余之從  
容古固有不並兮豈知其故也湯禹久遠兮邈不可慕  
也懲違改忿兮抑心而自強離慙而不遷兮願志之有  
像進路北次兮日昧昧其將暮舒憂娛哀兮限之以大  
故亂曰浩浩沅湘兮分流汨兮修路幽蔽兮道遠忽兮  
曾嗟恒悲兮永歎慨兮世既莫吾知兮人心不可謂兮



懷情抱質兮獨無匹兮伯樂既歿兮驥將焉程兮人生  
有命兮各有所錯兮定心廣志余何畏懼兮曾傷爰哀  
永歎喟兮世溷濁不吾知心不可謂兮知死不可讓兮  
願勿愛兮明以告君子兮吾將以為類兮

○懷沙

思美

人兮擘涕而竚眙媒絕路阻兮言不可結而詒蹇蹇之  
煩冤兮溷滯而不發申旦以舒中情兮志沈菀而莫達  
願寄言於浮雲兮遇豐隆而不將因歸鳥而致辭兮羌  
迅高而難當高辛之靈盛兮遭玄鳥而致詒欲變節以

從俗兮媿易初而屈志獨歷年而離愍兮羗馮心猶未  
化寧隱閔而壽考兮何變易之可為知前轍之不遂兮  
未改此度車既覆而馬顛兮蹇獨懷此異路勒騏驥而  
更駕兮造父為我操之遷逡次而勿驅兮聊假日以須  
時指嶠冢之西隈兮與曠黃以為期開春發歲兮白日  
出之悠悠吾將蕩志而愉樂兮導江夏以娛憂擘大薄  
之芳蒨兮搴長洲之宿莽惜吾不及古人兮吾誰與玩  
此芳草解篇薄與雜菜兮備以為交佩佩續紛以繚轉

兮遂萎絕而離異吾且儻徊以娛憂兮觀南人之變態  
竊快中心兮揚厥馮而不竦芳與澤其雜糅兮羗芳華  
自中出紛郁郁其遠烝兮滿內而外揚情與質信可保  
兮羗居蔽而聞章令薜荔而為理兮憚舉趾而緣木因  
芙蓉而為媒兮憚褰裳而濡足登高吾不說兮入下吾  
不能固朕形之不服兮然容與而狐疑廣遂前畫兮未  
改此度也命則處幽吾將罷兮顙及白日之未莫獨煢  
煢而南行兮思彭咸之故也

○思美人

惜往日之曾信兮

受命詔以照時奉先功以照下兮明法度之嫌疑國富  
強而法立兮屬貞臣而日嫉祕密事之載心兮雖過失  
猶弗治心純龐而不泄兮遭讒人而嫉之君含怒而待  
臣兮不清澈其然否蔽晦君之聰明兮虛惑誤又以欺  
弗叅驗以考實兮遠遷臣而弗思信讒諛之溷濁兮盛  
氣志而過之何貞臣之無罪兮被讟謗而見尤慙光景  
之誠信兮身幽隱而備之臨沅湘之玄淵兮遂自忍而  
沈流卒沒身而絕名兮惜壅君之不昭君無度而弗察

兮使芳草為數幽焉舒情而抽信兮恬死亡而不聊獨  
鄣壅而蔽隱兮使貞臣而無由聞百里之為虜兮伊尹  
烹於庖厨呂望屠於朝歌兮甯戚歌而飯牛不逢湯武  
與桓繆兮世孰云而知之吳信讒而弗味兮子胥死而  
後憂介子忠而立枯兮文君寤而追求封介山而為之  
禁兮報大德之優游思久故之親身兮因縞素而哭之  
或忠信而死節兮或訑謾而不疑弗省察而按實兮聽  
讒人之虛辭兮與澤其雜糅兮孰申旦而別之何芳草

之早歿兮微霜降而下戒諒不聰明而壅蔽兮使讒諛  
而日得自前世之嫉賢兮謂蕙若其不可佩妒佳冶之  
芬芳兮慕母妓而自好雖有西施之美容兮讒妒入以  
自代顛陳情以白行兮得罪過之不意情寃見之日明  
兮如列宿之錯置乘騏驎而馳騁兮無轡銜而自載乘  
汜汜以下流兮無舟楫而自備背法度而心治兮辟與  
此其無異寧溘死而流亡兮恐禍殃之有再不畢辭而  
赴淵兮惜壅君之不識

○惜  
往日

后皇嘉樹橘徠服兮受

命不遷生南國兮深固難徙更壹志兮綠葉素榮紛其  
可喜兮曾枝剌棘圓果搏兮青黃雜糅文章爛兮精色  
內白類任道兮紛緼宜修姱而不醜兮嗟爾幼志有以  
異兮獨立不遷豈不可喜兮深固難徙廓其無求兮蘇  
世獨立橫而不流兮閉心自慎終不失過兮秉德無私  
參天地兮顓歲并謝與長友兮淑離不淫梗其有理兮  
年歲雖少可師長兮行比伯夷置以為像兮  
頌 橘 悲  
回風之搖蕙兮心寃結而內傷物有微而隕性兮聲有

隱而先倡夫何彭咸之造思兮暨志介而不忘萬變其情豈可蓋兮孰虛偽之可長鳥獸鳴以號羣兮草苴比而不芳魚鼈鱗以自別兮蛟龍隱其文章故荼薺不同晦兮蘭茝幽而獨芳惟佳人之永都兮更統世而自貺眇遠志之所及兮憐浮雲之相徭介眇志之所惑兮竊賦詩之所明惟佳人之獨懷兮折芳椒以自處增歔歔之嗟嗟兮獨隱伏而思慮涕泣交而淒淒兮思不眠以至曙終長夜之曼曼兮掩此哀而不去寤後容以同流



兮聊逍遙以自恃傷太息之慙歎兮氣於邑而不可止  
紕思心以為縲兮編愁苦以為膺折若木以蔽光兮隨  
飄風之所仍存髣髴不見兮心踴躍其若湯撫珮衽以  
案志兮超惘惘而遂行歲習習其若頽兮肯亦冉冉而  
將至蘋蘩槁而節離兮芳以歇而不比憐思心之不可  
懲兮證此言之不可聊寧逝死而流亡兮不忍此心之  
常愁孤子喟而拭淚兮故子出而不還孰能思而不隱  
兮昭彭咸之所聞登石巒以遠望兮路眇眇之默默入

景響之無應兮聞省想而不可得愁鬱鬱之無快兮居  
戚戚而不解心鞿羈而不開兮氣繚轉而自締穆眇眇  
之無垠兮莽芒芒之無儀聲有隱而相感兮物有純而  
不可為貌曼曼之不可量兮縹綿綿之不可紆愁悄悄  
之常悲兮翩冥冥之不可娛凌大波而流風兮託彭咸  
之所居上高巖之峭岸兮處雌蜺之標巔據青冥而攄  
虹兮遂儵忽而捫天吸湛露之浮涼兮漱凝霜之雰雰  
依風穴以自息兮忽傾寤以嬋媛馮崑崙以瞰霧露兮

隱岷山以清江憚涌湍之礚礚兮聽波聲之洶洶紛容  
容之無經兮罔芒芒之無紀軋洋洋之無從兮馳委移  
之焉止漂翻翻其上下兮翼翼遙遙其左右汜瀟瀟其前  
後兮伴張弛之信期觀炎氣之相仍兮窺煙液之所積  
悲霜雪之俱下兮聽潮水之相擊借光景以往來兮施  
黃棘之枉策求介子之所存兮見伯夷之放迹心調度  
而弗去兮刻著志之無適曰吾怨往昔之所冀兮悼來  
者之遯遯浮江淮而入海兮從子胥而自適望大河之

洲渚兮悲申屠之抗迹驟諫君而不聽兮任重石之何

益心結絪而不解兮思蹇產而不釋

○悲回風○王逸曰九章者屈原之

所作也屈原思君念國憂思罔極故復作九章章者著明也言己所陳忠信之道甚著明也

大招

春受讞白日昭只春氣奮發萬物遽只冥凌挾行魂無  
逃只魂魄歸徠無遠遙只魂乎歸徠無東無西無南無  
北只東有大海溺水漉漉只螭龍並流上下悠悠只霧  
雨淫淫白皓膠只魂乎無東湯谷宗只魂乎無南南有  
炎火千里蝮蛇蜒只山林險隘虎豹蜿只鰐鰕短狐王

虺騫只魂乎無南蜮傷躬只魂乎無西西方流沙潏洋  
洋只豕首縱目被髮鬢只長爪踞牙譏笑狂只魂乎無  
西多害傷只魂乎無北北有寒山連龍施只代水不可  
涉深不可測只天白顚顚寒凝凝只魂乎無往盈北極  
只魂魄歸徠閒以靜只自恣荆楚安以定只逞志究欲  
心意安只窮身安樂年壽延只魂乎歸徠樂不可言只  
五穀六仞設旅梁只鼎臠盈望和致芳只內鵠鵠鵠味  
豺羹只魂乎歸徠恣所嘗只鮮螭甘雞和楚酪只醢豚

苦狗膾苴尊只吳酸蒿萋不沾薄只魂兮歸徕恣所擇  
只炙鵠烝鳧沽鷄醵只煎鱖臠雀遽爽存只魂乎歸徕  
麗以先只四酎并熟不翌隘只清馨凍飲不歆役只吳  
醴白蘘和楚瀝只魂乎歸徕不遽惕只代秦鄭衛鳴竽  
張只伏戲駕辯楚勞商只謳和揚阿趙簫倡只魂乎歸  
徕定空桑只二八接舞投詩賦只叩鐘調磬娛人亂只  
四上競氣極聲變只魂乎歸徕聽歌謠只朱脣皓齒嫋  
以姱只比德好閒習以都只豐肉微骨調以娛只魂乎

歸徠安以舒只嫵目宜笑蛾眉曼只容則秀雅稚朱顏  
只魂乎歸徠靜以安只姱修滂浩麗以佳只曾頰倚耳  
曲眉規只滂心綽態姣麗施只小腰秀頸若鮮卑只魂  
乎歸徠思怨移只易中和心以動作只粉白黛黑施芳  
澤只長袂拂面善留客只魂乎歸徠以娛昔只青色直  
眉美目嫵只靨輔奇牙宜笑嗎只豐肉微骨體便娟只  
魂乎歸徠恣所便只夏屋廣大沙堂秀只南房小壇觀  
絕雷只曲屋步瀾宜擾畜只騰駕步遊獵春囿只瓊轂

錯衡英華假只荳蘭桂樹鬱彌路只魂乎歸徠恣志慮  
只孔雀盈園畜鸞凰只鵠鴻羣晨雜鶩鷦只鴻鵠代遊  
曼鵠鵠只魂乎歸徠鳳凰翔只曼澤怡面血氣盛只永  
宜厥身保壽命只家室盈庭爵祿盛只魂乎歸徠居室  
定只接徑千里出若雲只三圭重侯聽類神只察篤天  
隱孤寡存只魂兮歸徠正始昆只田邑千畛人阜昌只  
美冒衆流德澤章只先威後文善美明只魂乎歸徠賞  
罰當只名聲若日照四海只德譽配天萬民理只北至



幽陵南交趾只西薄羊腸東窮海只魂乎歸徠尚賢士  
只發政獻行禁苛暴只舉傑壓陞誅譏罷只直羸在位  
近禹麾只豪傑執政流澤施只魂乎徠歸國家為只雄  
雄赫赫天德明只三公穆穆登降堂只諸侯畢極立九  
卿只昭質既設大侯張只執弓挾矢揖辭讓只魂乎徠

歸尚三王只

○王逸曰大招者屈原之所作也或曰景差疑不能明也屈原放流九年憂思煩亂

忍命將終故憤然大招其魂盛稱楚國之樂崇懷襄之德宜輔佐之以興至治因以風諫達已之志也拾遺記洞庭山浮於水上其下有金堂數百間玉女居之四時聞金石絲竹之聲徹於山頂楚懷王之時舉羣才賦

詩於水渢故云瀟湘洞庭之樂聽者令人忘老雖咸池  
九韶不得比焉每四仲之節王常統山以遊宴舉四仲  
之氣以為樂章仲春律中夾鍾乃作輕風流水之詩醺  
於山南時中蕤賓乃作皓露秋霜之曲後懷王好進姦  
雄羣賢逃越屈原以忠見斥隱於沅湘披蓁茹草混同  
禽獸不交世務採栢實以和桂膏用養心神被王逼逐  
乃赴清冷之水楚人思慕謂之水仙其神遊於天河精  
靈時降湘浦楚人為之立祠水經注屈原有賢姊聞  
原放逐亦來歸喻令自寬全鄉人冀其見從因名曰姊  
歸即女嬃也屈原流放忽然暫歸鄉人喜說因名曰  
歸鄉吳苑長沙羅縣有屈原自投之川山明水淨異  
於常處民為立廟在汨潭之西岸側石盤馬跡尚存相  
傳云原投川之  
日乘白驥而來

史記屈原既死之後楚有宋玉唐勒景差之徒者皆好

辭而以賦見稱然皆祖屈原之從容辭令終莫敢直諫  
其後楚日以削數十年竟為秦所滅太史公曰余讀  
離騷天問招魂哀郢悲其志適長沙觀屈原所自沈淵  
未嘗不垂涕想見其為人及見賈生弔之又怪屈原以  
彼其材游諸侯何國不容而自令若是讀服鳥賦同生  
死輕去就又爽然自失矣

新序宋玉因其友以見於楚襄王襄王待之無以異宋  
玉讓其友其友曰夫薑桂因地而生不因地而辛婦人

因媒而嫁不因媒而親子之事王未耳何怨於我宋玉  
曰不然昔者齊有良兔曰東郭婉盖一旦而去五百里  
於是齊有良狗曰韓盧亦一旦而走五百里使之遙見  
而指屬則雖韓盧不及衆兔之塵若躡迹而縱縹則雖  
東郭婉亦不能離今子之屬臣也躡迹而縱縹與遙見  
而指屬與詩曰將安將樂棄我如遺此之謂也其友人  
曰僕人有過僕人有過

○韓詩外傳同

宋玉集宋玉

事楚懷王言友人於王王以為  
小臣友人讓玉玉報友人書曰薑桂因地而生不因地  
而辛女因媒而嫁不因媒而親也○按此與上互異

宋玉事楚襄王而不見察意氣不得形於顏色或謂曰  
先生何談說之不揚計畫之疑也宋玉曰不然子獨不  
見夫玄蟄乎當其居桂林之中峻葉之上從容游戲超  
騰往來龍興而鳥集悲嘯長吟當此之時雖羿逢蒙不  
得正目而視也及其在枳棘之中也恐懼而掉慄危視  
而蹟行衆人皆得意焉此皮筋非加急而體益短也處  
世不便故也夫處勢不便豈可以量功校能哉詩不云  
乎駕彼四牡四牡項領夫久駕而長不得行項領不亦

宜乎易曰臀無膚其行超超此之謂也

漢書宋玉賦十  
六篇唐勒賦

四篇

楚辭

九辯

悲哉秋之為氣也蕭瑟兮草木搖落而變衰慄

慄兮若在遠行登山臨水兮送將歸沈寥兮天高而氣  
清索廖兮收潦而水清懣懣增欷兮薄寒之中人愴怛  
愴恨兮去故而就新坎廋兮貧士失職而志不平廓落  
兮羈旅而無友生惆悵兮而私自憐燕翩翩其辭歸兮  
蟬宋漠而無聲鴈雖離而南遊兮鷗雞啁哳而悲鳴獨

申旦而不寐兮哀蟋蟀之宵征時疊疊而過中兮蹇淹  
留而無成悲憂窮感兮獨處廊有美一人兮心不繹  
去鄉離家兮徠遠客超逍遙兮今焉薄專思君兮不可  
化君不知兮可奈何蓄怨兮積思心煩懣兮忘食事顚  
一見兮道余意君之心兮與余異車既駕兮竭而歸不  
得見兮心傷悲倚結軫兮長太息涕潺湲兮下霑軾忼  
慨絕兮不得中替亂兮迷惑私自憐兮何極心怲怲兮  
諒直皇天平分四時兮竊獨悲此凜秋白露既下白

草芳奄離披此梧楸去白日之昭昭兮襲長夜之悠悠  
離芳藹之方壯兮余萎約而悲愁秋既先戒之以白露  
兮冬又申之以嚴霜收恢急之孟夏兮然歛傑而沈藏  
葉菸邑而無色兮枝煩挐而交橫顏淫溢而將罷兮柯  
彷彿而萎黃蓀櫛櫟之可哀兮形銷鑠而瘵傷惟其紛  
糅而將落兮恨其失時而無當擘駢轡而下節兮聊逍  
遙以相佯歲忽忽而道盡兮恐余壽之弗將悼余生之  
不時兮逢此世之狂攘澹容與而獨倚兮蟋蟀鳴此西



堂心怵惕而震盪兮何所憂之多方仰明月而太息兮  
步列星而極明 竊悲夫蕙華之曾敷兮紛旖旎乎都  
房何曾華之無實兮從風雨而飛颺以為君獨服此蕙  
兮羌無以異於衆芳閔奇思之不通兮將去君而高翔  
心閔憐之慘悽兮願一見而有明重無怨而生離兮中  
結軫而增傷豈不鬱陶而思君兮君之門以九重猛犬  
狺狺而迎吠兮關梁閉而不通皇天浮溢而秋霖兮后  
土何時而得漘塊獨守此無澤兮仰浮雲而永歎 何

時俗之工巧兮背繩墨而改錯卻騏驥而不乘兮策駑  
駘而取路當世豈無騏驥兮誠莫之能善御見執轡者  
非其人兮故踟跳而遠去鳬鴈皆喑夫梁藻兮鳳愈飄  
翔而高舉園鑿而方枘兮吾固知其鉏鋸而難入衆鳥  
皆有所登棲兮鳳獨惶惶而無所集顛銜枚而無言兮  
嘗被君之渥洽太公九十乃顯榮兮誠未遇其匹合謂  
騏驥兮安歸謂鳳凰兮安棲變古易俗兮世衰今之相  
者兮舉肥騏驥伏匿而不見兮鳳凰高飛而不下鳥獸

猶知懷德兮何云賢士之不處驥不驟進而求服兮鳳  
亦不貪餒而妄食君棄遠而不察兮雖顛忠其焉得欲  
寂寞而絕端兮竊不敢忘初之厚德獨悲愁其傷人兮  
馮鬱鬱其安極 霜露慘淒而交下兮心尚幸其弗濟  
霰雪零糅其增加兮乃知遭命之將至顛微幸而有待  
兮泊莽莽兮與壅草同死願自往而徑遊兮路壅絕而  
不通欲循道而平驅兮又未知其所從然中路而迷惑  
兮自壓按而學誦性愚陋以褊淺兮信未達乎從容

竊美申包胥之氣盛兮恐時世之不固何時俗之工巧  
兮滅規槩而改鑿獨耿介而不隨兮願慕先聖之遺教  
處濁世而顯榮兮非余心之所樂與其無義而有名兮  
寧窮處而守高食不媮而為飽兮衣不苟而為溫竊慕  
詩人之遺風兮願託志乎素餐蹇充倔而無端兮泊莽  
莽而無垠無衣裘以禦冬兮恐溘死而不得見乎陽春  
靚杪秋之遙夜兮心繚悵而有哀春秋連連而日高  
兮然惆悵而自悲四時遞來而卒歲兮陰陽不可與儷

偕白日晚晚其將入兮明月銷鑠而滅毀歲忽忽而道  
盡兮老冉冉而俞死心搖說而日奔兮然怊悵而無冀  
中惻惻之悽愴兮長太息而增歎年洋洋以日往兮老  
嶮廓而無處事疊疊而覬進兮蹇淹留而躊躇何汜  
濫之浮雲兮森壅蔽此明月忠昭昭而顏見兮然露晞  
而莫達願皓日之顯行兮雲濛濛而蔽之竊不自聊而  
顧忠兮或黜黜而汙之堯舜之抗行兮瞭冥冥而薄天  
何險巇之嫉妒兮被以不慈之偽名彼日月之照明兮

尚黯黹而有瑕何況一國之事兮亦多端而膠加 被  
荷綢之晏晏兮然潢洋而不可帶既驕美而伐武兮負  
左右之耿介憎愠憊之修美兮好夫人之慷慨衆蹢躅  
而日進兮美超遠而逾邁農夫輟耕而容與兮恐田野  
之蕪穢事綿綿而多私兮竊悼後之危敗世雷同而炫  
曜兮何毀譽之昧昧今修飾而窺鏡兮後尚可以竄藏  
頽寄言夫流星兮羗儵忽而難當卒壅蔽此浮雲兮下  
暗漠而無光堯舜皆有所舉任兮故高枕而自適諒無

怨於天下兮心焉取此怵惕察騏驥之瀏瀏兮馭安用  
夫強策諒城郭之不足恃兮雖重介之何益遭翼翼而  
無終兮怵惛惛而愁約生天地之若過兮功不成而無  
効願沈滯而無見兮尚欲布名乎天下然潢洋而不遇  
兮直恟愁而自苦莽洋洋而無極兮忽翱翔之焉薄國  
有驥而不知察兮焉皇皇而更索寔戚謳於車下兮桓  
公聞而知之無伯樂之善相兮今誰使乎譽之罔流涕  
以聊慮兮惟著意而得之紛純純之顛忠兮妒被離而

鄣之 願賜不肖之軀而別離兮放遊志乎雲中察精  
氣之搏搏兮驚諸神之湛湛騫白霓之習習兮歷羣靈  
之豐豐左朱雀之爰爰兮右蒼龍之躍躍屬雷師之聞  
聞兮通飛廉之衙衙前輕轅之鏘鏘兮後輜檠之後從  
載雲旗之委蛇兮扈屯騎之容容計專專之不可化兮

願遂推而為藏賴皇天之厚德兮還及君之無恙

○王逸曰

九辯者宋玉之所作也辯者變也謂陳道德以變說君也屈原懷忠貞之性而被讒邪作九歌九章之頌以風諫懷王宋玉者屈原弟子也閔惜其師忠而放逐故作九辯以述其志

招魂 朕幼清以廉



潔兮身服義而未沫主此盛德兮牽於俗而蕪穢上無  
所考此盛德兮長離殃而愁苦帝告巫陽曰有人在下  
我欲輔之魂魄離散汝筮予之巫陽對曰掌寢上帝其  
命難從若必筮予之恐後之謝不能復用巫陽焉乃下  
招曰魂兮歸來去君之恒幹何為四方些舍君之樂處  
而離彼不祥些魂兮歸來東方不可以託些長人千仞  
唯魂是索些十日出流金鑠石些彼皆習之魂往必  
釋些歸來歸來不可以託些魂兮歸來南方不可以止

此雕題黑齒得人肉而祀以其骨為醢此蝮蛇養養封  
狐千里此雄虺九首往來儵忽吞人以益其心此歸來  
歸來不可以久淫此魂兮歸來西方之害流沙千里此  
旋入雷淵靡散而不可止此奔而得脫其外曠宇此赤  
螳若象玄蠓若壺此五穀不生叢管是食此其土爛人  
求水無所得此彷徨無所倚廣大無所極此歸來歸來  
恐自遺賊此魂兮歸來北方不可以止此增冰峨峨飛  
雪千里此歸來歸來不可以久此魂兮歸來君無上天

此虎豹九關啄害下人此一夫九首拔木九千此豺狼  
從目往來僂僂此懸人以娛投之深淵此致命於帝然  
後得瞑此歸來歸來往恐危身此魂兮歸來君無下此  
幽都此土伯九約其角鬻鬻此敷腠血拇逐人駢駢此  
參目虎首其身若牛此此皆甘人歸來歸來恐自遺災  
此魂兮歸來入修門此工祝招君背行先此秦篝齊縷  
鄭綿絡此招具該備永嘯呼此魂兮歸來反故居此天  
地四方多賊姦此像設君室靜聞安此高堂邃宇檻層

軒此層臺累榭臨高山此網戶朱綴刻方連此冬有突  
厦夏室寒此川谷徑復流潺湲此光風轉蕙汜崇蘭此  
經堂入奧朱塵筵此砥室翠翹挂曲瓊此翡翠珠被爛  
齊光此翦阿拂壁羅幃張此纂組綺縞結琦璜此室中  
之觀多珍怪此蘭膏明燭華容備此二八侍宿射遞代  
此九侯淑女多迅衆此盛鬻不同制實滿宮此容態好  
比順彌代此弱顏固植審其有意此姱容修態絙洞房  
此蛾眉曼睂目騰光此靡顏膩理遺視睇此離榭修幕

侍君之閒此翡翠幃飾高堂此紅壁沙版玄玉之梁  
此仰觀刻桷畫龍蛇此坐堂伏檻臨曲池此芙蓉始發  
雜芰荷此紫莖屏風文緣波此文異豹飾侍陂陲此軒  
轅既低步騎羅此蘭薄戶樹瓊木籬此魂兮歸來何遠  
為此室家遂宗食多方此稻粱穰麥粃黃粱此大苦鹹  
酸辛甘行此肥牛之腴肺若芳此和酸若苦陳吳羹此  
肺鼈炮羔有柘漿此鵠酸臍鳧煎鴻鴈此露雞臙臍厲  
而不爽此拒妝蜜餌有餒餒此瑤漿靈勺實羽觴此挫

糟凍飲耐清涼此華酌既陳有瓊漿此歸來反故室敬  
而無妨此肴羞未通女樂羅此敔鐘按鼓造新歌此涉  
江采菱發揚荷此美人既醉朱顏酡此娛光眇視目曾  
波此被文服纖麗而不奇此長髮曼鬢艷陸離此二八  
齊容起鄭舞此衽若交竿撫案下此竽瑟狂會楨鳴鼓  
此宮庭震驚發激楚此吳歛蔡謳奏大呂此士女雜坐  
亂而不分此放敔組纓班其相紛此鄭衛妖玩來雜陳  
此激楚之結獨秀先此崑蔽象棊有六簿此分曹並進

道相迫此成臬而年呼五白此晉制犀比費白日此鏗  
鐘搖簾楔梓瑟此娛酒不廢沈日夜此蘭膏明燭華鐙  
錯此結撰至思蘭芳假此人有所極同心賦此耐飲盡  
歡樂先故此魂兮歸來反故居此亂曰獻歲發春兮汨  
吾南征茱萸齊葉兮白芷生路貫廬江兮左長薄倚沼  
畦瀛兮遙望博青驪結駟兮齊千乘懸火延起兮玄顏  
烝步及驟處兮誘騁先抑驚若通兮引車右還與王趨  
夢兮課後先君王親發兮憚青兕朱明承夜兮時不可

以淹皋蘭被征兮斯路漸湛湛江水兮上有楓目極千

里兮傷心悲魂兮歸來哀江南

○王逸曰招魂者宋玉之所作也宋玉哀憐屈

原忠而斥棄愁懣山澤厥命將落故作招魂外陳四方之惡內崇楚國之美以風諫懷王冀其覺悟而還之也

宋玉賦

高唐賦

昔者楚襄王與宋玉遊於雲夢之臺望高

唐之觀其上獨有雲氣崑兮直上忽兮改容湏臾之間

變化無窮王問玉曰此何氣也玉對曰所謂朝雲者也

王曰何謂朝雲玉曰昔者先王嘗遊高唐怠而晝寢夢

見一婦人曰妾巫山之女也為高唐之客聞君遊高唐



顓薦枕席王因幸之去而辭曰妾在巫山之陽高丘之  
岵旦為朝雲暮為行雨朝朝暮暮陽臺之下旦朝視之  
如言故為立廟號曰朝雲王曰朝雲始出狀若何也王  
對曰其始出也暉兮若松櫨其少進也晰兮若姣姬揚  
袂鄣日而望所思忽兮改容偕兮若駕駟馬建羽旗湫  
兮如風淒兮如雨風止雨霽雲無處所王曰寡人方今  
可以遊乎王曰可王曰其何如矣王曰高矣顯矣臨望  
遠矣廣矣普矣萬物祖矣上屬於天下見於淵珍怪奇

偉不可稱論王曰試為寡人賦之王曰唯唯惟高唐之  
大體兮殊無物類之可儀比巫山赫其無儔兮道互折  
而層累登巉巖而下望兮臨大隄之穉水遇天雨之新  
霽兮觀百谷之俱集漚洶洶其無聲兮潰淡淡而並入  
滂洋洋而四施兮翦湛湛而不止長風至而波起兮若  
麗山之孤畝勢薄岸而相擊兮隘交引而却會嶠中怒  
而持高兮若浮海而望碣石礫礫礫而相摩兮嶸震天  
之礚礚巨石溺溺之澆澆兮沫潼潼而高厲水澹澹而

盤紆兮洪波淫淫之溶滴奔揚踊而相擊兮雲興聲之  
需需猛獸驚而跳駭兮妄奔走而馳邁虎豹豺兕失氣  
恐喙鵬鶚鷹鷂飛揚伏竄股戰脅息安敢妄挈於是水  
蟲盡暴乘渚之陽龜鼉鱣鮪交積縱橫振鱗奮翼蜚蜚  
蜿蜿中阪遥望玄木冬榮煌煌熒熒奪人目精爛兮若  
列星會不可殫形榛林鬱盛葩葉覆蓋雙椅垂房糾枝  
還會徒靡澹淡隨波閤藹東西施翼猗狔豐沛綠葉紫  
裏丹莖白蒂纖條悲鳴聲似竽籟清濁相和五變四會

感心動耳迴腸傷氣孤子寡婦寒心酸鼻長吏墮官賢  
士失志愁思無已歎息垂淚登高遠望使人心瘁盤岸  
巘坼振陳磴磴磐石險峻傾崎崖隤巖嶇參差縱橫相  
追陬互橫牾背穴偃蹠交加累積重疊增益狀似砥柱  
在巫山之下仰視山巔肅何芊芊炫耀虹蜺俯視峭嶸  
窅寥窈冥不見其底虛聞松聲傾岸洋洋立而熊經久  
而不去足盡汗出悠悠忽忽怛悵自失使人心動無故  
自恐賁育之斲不能為勇卒愕異物不知所出緹緹萃

莘若生於鬼若出於神狀似走獸或象飛禽譎詭奇偉  
不可究陳上至觀側地蓋底平箕踵漫衍芳草羅生秋  
蘭芷蕙江離戴菁青荃射干揭車芑并薄草靡靡聯延  
天天越香掩掩衆雀嗷嗷雌雄相失哀鳴相號王雎鸝  
黃正冥楚鳩姊歸思婦垂雞高巢其鳴喈喈當年遨遊  
更唱迭和赴曲隨流有方之士羨門高谿上成鬱林公  
樂聚穀進純犧禱璇室醮諸神禮太乙傳祝已具言辭  
已畢王乃乘玉輿駟蒼螭垂旒旌旆合諧紉大絃而雅

歌流冽風過而增悲哀於是調謳令人怵悵懔懔脅息  
增歎於是乃縱獵者基趾如星傳言羽獵銜枚無聲弓  
弩不發罟罟不傾涉漭漭馳革革飛鳥未及起走獸未  
及發弭節奄忽蹄足灑血舉動先得獲車已實王將欲  
往見之必先齋戒差時擇日簡輿玄服建雲旆蜺為旌  
翠為蓋風起雨止千里而逝蓋發蒙往自會思萬里憂  
國害開聖賢輔不逮九竅通鬱精神察滯延年益壽千  
萬歲

○汪洋弘麗遂開上林羽獵一派  
後人踵事增華不能出其範圍

神女賦

楚襄王

與宋玉遊於雲夢之浦使玉賦高唐之事其夜玉寢夢  
與神女遇其狀甚麗玉異之明日以白王王曰其夢若  
何玉對曰晡夕之後精神恍惚若有所喜紛紛擾擾未  
知何意目色髣髴乍若有記見一婦人狀甚奇異寐而  
夢之寤不自識罔方不樂悵爾失志於是撫心定氣復  
見所夢王曰狀如何也玉曰茂矣美矣諸好備矣盛矣  
麗矣難測究矣上古既無世所未見瓌姿瑋態不可勝  
讚其始來也耀乎若白日初出照屋梁其少進也皎若

明月舒其光須臾之間美貌橫生燁兮如花溫乎如瑩  
五色並馳不可殫形詳而視之奪人目精其盛飾也則  
羅紈綺縠盛文章極服妙綵照萬方振繡衣被袿裳穠  
不短纖不長步裔裔兮曜殿堂忽兮改容婉若游龍乘  
雲翔嬈被服倪薄裝沐蘭澤含若芳性和適宜待旁順  
序卑調心腸王曰若此盛矣試為寡人賦之玉曰唯唯  
夫何神女之姣麗兮含陰陽之渥飾被華藻之可好兮  
若翡翠之奮翼其象無雙其美無極毛嬙鄠袂不足程



式西施掩面比之無色近之既妖遠之有望骨法多奇  
應君之相視之盈目孰者克尚私心獨說樂之無量交  
希恩疎不可盡暢他人莫覩玉覽其狀其狀我我何可  
極言貌豐盈以莊姝兮苞溫潤之玉顏眸子炯其精朗  
兮瞭多美而可觀眉聯娟以蛾揚兮朱脣的其若丹素  
質幹之醲實兮志解泰而體閑既婉孌於幽靜兮又婆  
娑乎人間宜高殿以廣意兮翼放縱而綽寬動霧縠以  
徐步兮拂墀聲之珊珊望余帷而延視兮若流波之將

瀾奮長袖以正衽兮立蹢躅而不安澹清靜其惜慙兮  
性沈詳而不煩時容與以微動兮志未可乎得原意似  
近而既遠兮若將來而復旋褰余幃而請御兮願盡心  
之惓惓懷貞亮之潔清兮卒與我乎相難陳嘉辭而云  
對兮吐芬芳其若蘭精交接以來往兮心凱康以樂歡  
神獨亨而未結兮魂煢煢以無端舍然諾其不分兮喟  
揚音而哀歎頽薄怒以自持兮曾不可乎犯干於是搖  
珮飾鳴玉鸞整衣服斂容顏顧女師命太傅歡情未接

將辭而去遷延引身不可親附似逝未行中若相首目  
略微眄精彩相授志態橫出不可勝記意離未絕神心  
怖覆禮不遑訖辭不及究顙假湏臾神女稱遽徊腸傷  
氣顛倒失據闇然而冥忽不知處情獨私懷誰者可語  
惆悵垂涕求之至曙

登徒子  
好色賦

大夫登徒子侍於楚襄

王短宋玉曰玉為人體貌閑麗口多微辭又性好色顙  
王勿與出入後宮王以登徒子之言問於宋玉玉曰體  
貌閑麗所受於天也口多微辭所學於師也至於好色

臣無有也王曰子不好色亦有說乎有說則止無說則退王曰天下之佳人莫若楚國楚國之麗者莫若臣里臣里之美者莫若臣東家之子臣東家之子增之一分則太長減之一分則太短著粉則太白施朱則太赤眉如翠羽肌如白雪腰如束素齒如含貝嫣然一笑惑陽城迷下蔡然此女登牆闚臣三年至今未許也登徒子則不然其妻蓬頭攣耳齟脣歷齒旁行蝸倮又疥又痔登徒子說之使有五子王熟察之誰為好色者矣是時

秦章華大夫在側因進而稱曰今夫宋玉盛稱隣之女  
以為美色愚亂之邪臣自以為守德謂不如彼矣且夫  
南楚窮巷之妾焉足為大王言乎若臣之陋目所曾覩  
者未敢云也王曰試為寡人說之大夫曰唯唯臣少曾  
遠游周覽九土足歷五都出咸陽熙邯鄲從容鄭衛溱  
洧之間是時向春之末迎夏之陽鷓鴣喈喈羣女出桑  
此郊之妹華色含光體美容冶不待飾粧臣觀其麗者  
因稱詩曰遵大路兮攬子祛贈以芳華辭甚妙於是處

予恍若有望而不來忽若有來而不見意密體疏俯仰  
異觀含喜微笑竊視流眄復稱詩曰寤春風兮發鮮榮  
絜齋俟兮惠音聲贈我如此兮不如無生因遷延而辭  
避蓋徒以微辭相感動精神相依憑目欲其顏心顧其  
義揚詩守禮終不過差故足稱也於是楚王稱善宋王  
遂不退

賦諷

楚襄王時宋玉休歸唐勒讒之於王曰玉

為人身體容冶口多微詞出愛主人之女入事大王願  
王疏之玉休還王謂玉為人身體容冶口多微詞出愛

主人之女入事寡人不亦薄乎王曰臣身體容冶受之  
二親口多微詞聞之聖人臣嘗出行僕饑馬疲正值主  
人門開主人翁出嫗又到市獨有主人女在女欲置臣  
堂上太高堂下太卑乃更於蘭房之室止臣其中中有  
鳴琴焉臣援而鼓之為幽蘭白雪之曲主人之女翳承  
日之華披翠雲之裘更被白縠之單衫垂珠步搖來排  
臣戶曰上客日高無乃饑乎為臣炊彫胡之飯烹露葵  
之羹來勸臣食以其翡翠之釵挂臣冠纓臣不忍仰視

為臣歌曰歲將暮兮日已寒中心亂兮勿多言臣復援  
琴而鼓之為秋竹積雪之曲主人之女又為臣歌曰內  
怵惕兮徂玉牀橫自陳兮君之傍君不御兮妾誰怨日  
將至兮下黃泉玉曰吾寧殺人之父孤人之子誠不忍  
愛主人之女玉曰止止寡人於此時亦何能已也

○與登徒

篇辭音不甚相  
遠而格調自異

風賦

楚襄王遊於蘭臺之宮宋玉景差

侍有風颯然而至王乃披襟而當之曰快哉此風寡人  
所與庶人共者邪宋玉對曰此獨大王之風耳庶人安



得而共之王曰夫風者天地之氣溥暢而至不擇貴賤  
高下而加焉今子獨以為寡人之風豈有說乎宋玉對  
曰臣聞於師枳句來巢空穴來風其所託者然則風氣  
殊焉王曰夫風始安生哉宋玉對曰夫風生於地起於  
青蘋之末侵淫谿谷盛怒於土囊之口緣太山之阿舞  
於松柏之下飄忽溇滂激颺燥怒眩眩雷聲迴穴錯迤  
蹙石伐木梢殺林莽至其將衰也被麗披離衝孔動捷  
眴渙燦爛離散轉移故其清涼雄風則飄舉升降乘凌

高城入於深宮邸華葉而振氣徘徊於桂椒之間翱翔  
於激水之上將擊芙蓉之菁獵蕙草離秦衡緊新夷被  
稊楊迴穴衡陵蕭條衆芳然後倘佯中庭北上玉堂躋  
於羅帷經於洞房廼得為大王之風故其風中人狀直  
慄慄清涼增歎清清泠泠愈病析醒發明耳目寧  
體便人此所謂大王之雄風也王曰善哉論事夫庶人  
之風豈可聞乎宋玉對曰夫庶人之風塌然起於窮巷  
之間堀堦揚塵勃鬱煩冤衝孔竅門動沙樞吹死灰駭

溷濁揚腐餘邪薄入甕牖至於室廬故其風中人狀直  
慄溷鬱邑毆溫致溼中心慘怛生病造熱中脣為胗得  
目為矇眇醵嗽獲死生不卒此所謂庶人之雌風也

笛賦

余嘗觀於衡山之陽見奇篠異榦罕節間枝之叢生

也其處磅礴千仞絕谿凌阜隆崛萬丈盤石雙起丹水  
涌其左醴泉流其右其陰則積雪凝霜霧露生焉其東  
則朱天皓日素朝明焉其南則盛夏清微春陽榮焉其  
西則涼風遊旋吸逮存焉榦枝洞長桀出有良名高師

曠將為陽春北鄙白雪之曲假塗南國至此山望其叢  
生見其異形曰命陪乘取其雄焉宋意將送荆卿於易  
水之上得其雌焉於是乃使王爾公輸之徒合妙意角  
較手遂以為笛於是天旋少陰白日西靡命嚴春使午  
子延長頸奮玉手摘朱脣瞻皓齒頰頰臻玉貌起吟清  
商追流徵歌伐檀號孤子發久轉舒積鬱其為幽也甚  
乎懷永抱絕喪夫天亡稚子纖悲徵痛毒離肌腸腴理  
激叫入青雲慷慨切窮土度曲羊腸坂揆殃振奔逸遊

洪志列絃節武毅發沈憂結阿鷹揚叱太一聲淫淫以  
黯黯氣旁合而爭出歌壯士之必狂奔猛勇于飄疾麥  
秀漸漸兮鳥聲草翼招伯奇於源陰追申子於晉域夫  
奇曲雅樂所以禁淫也錦繡黼黻所以禦暴也縟則泰  
過是以檀卿刺鄭聲周人傷北里也亂曰芳林皓幹有  
奇寶兮博人通明樂斯道兮般衍瀾漫終不老兮雙枝  
間麗貌甚好兮八音和調成稟受兮善善不襄為世保  
兮絕鄭之遺離南楚兮美風洋洋而暘茂兮嘉樂悠長

俟賢士兮鹿鳴萋萋思我友兮安心隱志可長久兮

舞賦

楚襄王既遊雲夢將置酒宴飲謂宋玉曰寡人欲觴

羣臣何以娛之玉曰臣聞激楚結風陽阿之舞材人之  
窮觀天下之至妙噫可進乎王曰試為寡人賦之玉曰  
唯唯爾乃鄭女出進二八徐待姣服極麗姁嫵致態貌  
嫵妙以妖冶紅顏曄其陽華眉連娟以增繞目流睇而  
橫波珠翠灼爍而照曜兮華袿飛鬋而雜纖羅顧形影  
自整裝順微風揮若芳動朱唇紆清揚而抗音高歌為

樂之方其始興也若俯若仰若來若往雍容惆悵不可  
為象羅衣從風長袖交橫駱驛飛散颯沓合并綽約閒  
靡機迅體輕合場通進案次而俟埒簇角妙夸容乃理  
軼態橫出瑰姿譎起迴身還入迫於急節紆形赴遠淮  
以擢折纖縠蛾飛繽焱若絕體如遊龍袖如素蛻遷延  
微笑退復次列觀者稱麗莫不怡悅

賦鈞

宋玉與登徒

子偕受釣於玄洲止而並見於楚襄王登徒子曰夫玄  
洲天下之善釣者也願王觀焉王曰其善奈何登徒子

對曰夫玄洲釣也以三尋之竿八絲之線餌若組續釣如細鍼以出三尺之魚於數仞之水中豈可謂無術乎夫玄洲芳水餌挂繳釣其意不可得退而牽行下觸青泥上則波颺玄洲因水勢而施技頡之頡之委縱收斂與魚沈浮及其解弛因而獲之襄王曰善宋玉進曰今察玄洲之釣未可謂能持竿也又烏足為大王言乎王曰子之所謂善釣者何王曰臣所謂善釣者其竿非竹其綸非絲其鉤非鍼其餌非蠅也王曰頡遂聞之宋玉



對曰昔堯舜禹湯之釣也以賢聖為竿道德為綸仁義為鈎祿利為餌四海為池萬民為魚釣道微矣非聖人其孰能察之王曰迅哉說乎其釣不可見也宋玉對曰其釣易見王不察爾昔殷湯以七十里周文以百里興利除害天下歸之其餌可謂芳矣南面而掌天下歷載數百到今不廢其綸可謂紉矣羣生寢其澤民氓畏其罰其釣可謂均矣功成而不墮名立而不改其竿可謂強矣若夫竿折綸絕餌墜鈎決波涌魚失是則夏桀商

紂不通夫釣術也今察玄洲之釣也左扶魚留右執槁竿立乎潢汙之涯倚乎楊柳之間精不離乎魚喙思不出乎鮒鰕形容枯槁神色憔悴樂不役勤獲不當費斯乃水濱之役夫也已君王又何稱焉王若見堯舜之洪竿攄禹湯之修綸投之於瀆視之於海漫漫羣生孰非吾有其為大王之釣不亦樂乎

大言賦

楚襄王與唐勒

景差宋玉遊於陽雲之臺王曰能為寡人大言者上座王因唏曰操是太阿剝一世流血冲天車不可以厲至

唐勒曰壯士憤兮絕天維北斗戾兮太山夷至景差曰  
校士猛毅臯陶嘻大笑至兮摧覆思鋸牙雲睇甚大吐  
舌萬里唾一世至宋玉曰方地為車圓天為蓋長劍耿  
耿倚天外王曰未也玉曰并吞四夷飲沽河海拔越九  
州無所容止身大四塞愁不可長據地跼天迫不得仰

小言賦

楚襄王既登陽雲之臺令諸大夫景差唐勒宋  
玉等並造大言賦賦畢而宋玉受賞王曰此賦之迂誕  
則極巨偉矣抑未備也且一陰一陽道之所貴小往大

來剝復之類也是故卑高相配而天地位三光並照則  
大小備能高而不能下非兼道也能麤而不能細非妙  
工也然則上坐者未足明賞賢人有能為小言賦者賜  
之雲夢之田景差曰載氛埃兮乘剝塵體輕蚊翼形微  
蚤鱗聿皇浮踊凌雲縱身經由鍼孔出入羅巾飄妙翩  
綿乍見乍泯唐勒曰析飛糠以為輿剖糝糟以為舟泛  
然投乎杯水中淡若巨海之洪流蠅蚋皆以顧盼附蟻  
螻而遨遊寧隱微以無準原存亡而不憂又曰館於蠅

鬚宴於毫端烹蟲脰切蟣肝會九族而同濟猶委餘而不殫宋玉曰無內之中微物潛生比之無象言之無名蒙蒙滅景昧昧遺形超於太虛之域出於未兆之庭纖於毳末之微蔑陋於葦毛之方生視之則眇眇望之則冥冥離朱為之歎悶神明不能察其情二子之言磊磊皆不小何如此之為精王曰善賜以雲夢之田

法言或曰賦可


以諷乎曰諷則已不已吾恐不免於勸也或曰霧縠之組麗曰女工之蠹矣劍客論曰劍可以愛身曰狴犴使人多禮乎或問景差唐勒宋玉枚乘之賦也蓋乎曰必也淫淫則奈何曰詩人之賦麗以則辭人之賦麗以淫

新序楚威王問於宋玉曰先生其有遺行邪何士民衆庶不譽之甚也宋玉對曰唯然有之願大王寬其罪使得畢其辭客有歌於郢中者其始曰下里巴人國中屬而和者數千人其為陽陵采薇國中屬而和者數百人其為陽春白雪國中屬而和者數十人而已矣引商刻角雜以流徵國中屬而和者不過數人是其曲彌高者其和彌寡故鳥有鳳而魚有鯨鳳凰上擊於九千里絕浮雲負蒼天翱翔乎窈冥之上夫糞田之鵝豈能與之

斷天地之高哉鯨魚朝發崑崙之墟暴鬚於碣石暮宿  
於孟諸夫尺澤之鯢豈能與之量江海之大哉故非獨  
鳥有鳳而魚有鯨也士亦有之夫聖人瑰意奇行超然  
獨處世俗之民又安知臣之所為哉

○文選威王作襄  
王陽陵采薇作陽

阿璉露刻角作刻羽鯨作  
鯢真田之鰓作蕃籬之鸚



繹史卷一百三十二